

05 SEP 2002

Sabah-Pendatang/I

BAKI 536 PENDATANG FILIPINA AKAN DIHANTAR PULANG TIDAK LAMA LAGI

KOTA KINABALU, 5 Sept (Bernama) -- Misi pencari maklumat dari Manila yang diketuai penasihat presiden mengenai hal ehwal masyarakat Islam, Nur Jaafar berkata 536 warga Filipina yang masih ditahan di pusat tahanan sementara di Sabah akan dihantar pulang dengan secepat mungkin.

"Dengan secepat mungkin, sebaik saja kami pulang ke Manila. Kami beri jaminan kepada kerajaan dan rakyat anda bahawa kami akan membawa pulang rakyat kami," kata Nur Jaafar pada sidang media sebelum rombongannya berlepas pulang ke Manila hari ini.

Rombongan 10 anggota itu yang terdiri para pegawai dari Kementerian Kesihatan, Jabatan Pertahanan, Jabatan Hal Ehwal Luar, Jabatan Kebajikan Masyarakat dan Duta Filipina ke Malaysia Jose Brillantes berada di sini sejak Isnin.

Selama empat hari berada di Sabah, mereka telah mengunjungi rakyat Filipina yang ditahan di pusat-pusat tahanan sementara di Menggatal, dekat sini, Tawau dan Sandakan.

Menteri Di Jabatan Ketua Menteri Datuk Abdul Ghapur Salleh yang turut hadir pada sidang media tersebut berkata kerajaan negeri dan misi pencari maklumat itu bersetuju supaya kumpulan rakyat Filipina itu dihantar balik.

Minggu lepas, Perdana Menteri Datuk Seri Dr Mahathir Mohamad berkata Malaysia bersetuju memenuhi permintaan Presiden Gloria Arroyo agar ditangguhkan penghantaran pulang rakyat Filipina bagi membolehkan pasukan pencari maklumat dari Manila memeriksa keadaan di pusat-pusat tahanan berikutan laporan kononnya polis Malaysia telah memberi layanan buruk kepada pendatang tanpa izin dari Filipina.

Nur Jaafar juga berkata pasukannya berpuas hati kerana Kerajaan Malaysia telah mengambil pelbagai usaha bagi mengurangkan kesulitan yang dihadapi oleh warga Filipina di pusat-pusat tahanan di negara ini.

Ditanya mengenai langkah yang akan diambil oleh Manila bagi menghalang rakyatnya memasuki Sabah secara haram, Nur Jaafar berkata: "Sebab itulah kami bersetuju membuka lebih banyak pusat memproses pasport di negara kami."

Katanya, pasukan pencari maklumat itu turut mengesyorkan agar lebih banyak pegawai diplomatik dihantar ke Malaysia termasuk ke Sabah bagi mempercepatkan proses pengeluaran dokumen perjalanan bagi warga Filipina.

Sementara itu, Brillantes berkata buat masa ini 13 pegawai Filipina berada di sini bagi memproses dokumen perjalanan rakyat negaranya.

Nur Jaafar berkata menurut data yang diterima oleh pihaknya, terdapat kira-kira 300,000 warga Filipina di Sabah dan sejak Januari tahun ini, hanya kira-kira 27,000 dari jumlah itu kembali.

-- BERNAMA

MK TS SP MOZ